

Ringgit

MEI 2012

RAKAN KEWANGAN ANDA

ISSN 2180-3684 • Bil 5/12 • KKDN: PP 16897/05/2013 (032581)

Keselamatan Perbankan Internet



di dalam
RINGGIT
bulan ini

- Modal Bukan Kewangan Untuk Persaraan
- Menuntut Wang Simpanan Ahli KWSP Yang Meninggal Dunia
- Selaraskan Pelaburan Dengan Matlamat Kewangan
- Kereta Baru atau Kereta Terpakai?

ISSN 2180-3684



9 772180 368003



GABUNGAN
PERSATUAN-PERSATUAN
PENGGUNA MALAYSIA



BANK NEGARA MALAYSIA
CENTRAL BANK OF MALAYSIA

Sidang Redaksi

Penasihat

Datuk Marimuthu Nadason
Presiden FOMCA

Ketua Sidang Pengarang
Dato' Paul Selva Raj

Editor

Mohd Yusof bin Abdul Rahman

Sidang Pengarang
Siti Rahayu bt Zakaria
Yu Kin Len

Ringgit merupakan penerbitan usaha sama di antara Bank Negara Malaysia dan FOMCA. Ia diterbitkan pada setiap bulan.

Gabungan Persatuan-Persatuan Pengguna Malaysia
No. 1D-1, Bangunan SKPPK
Jalan SS9A/17
47300 Petaling Jaya
Selangor Darul Ehsan
Tel : 03-7876 2009
Faks : 03-7877 1076
E-mel : fomca@fomca.org.my
Sesawang: www.fomca.org.my

Bank Negara Malaysia
Jalan Dato' Onn
50480 Kuala Lumpur
Tel : 03-2698 8044
Faks : 03-2174 1515

Diurus terbit oleh:
Pusat Penyelidikan dan Sumber Pengguna (CRRC)
No. 1D-1, Bangunan SKPPK
Jalan SS9A/17
47300 Petaling Jaya
Selangor Darul Ehsan
Tel : 03-7875 2392
Faks : 03-7875 5468
E-mel : info@crcc.org.my
Sesawang: www.crcc.org.my

Dicetak oleh:
فرچیتکن اساس جاي (مليسيا) سنديرين برحد
Percetakan Asas Jaya (M) Sdn Bhd
No. 5B Tingkat 2
Jalan Pipit 2
Bandar Puchong Jaya
47100 Puchong Jaya
Selangor Darul Ehsan

Artikel yang disiarkan dalam Ringgit tidak semestinya mencerminkan pendirian dan dasar Bank Negara Malaysia atau FOMCA. Ia merupakan pendapat penulis sendiri.



Tip Keselamatan Perbankan Internet

Perkara yang anda PERLU lakukan

- Pastikan kata laluan/nombor PIN anda disimpan dengan selamat. Jika perlu, hafal dan tukar kata laluan anda dari semasa ke semasa.
- Semasa anda *login*, sila lihat alamat <http://> pada URL.
- Pastikan anda keluar sepenuhnya setiap kali sesi perbankan internet selesai dilakukan dan tidak hanya menutup *browser*.
- Sekiranya anda tidak yakin terhadap ciri-ciri keselamatan pada komputer, jangan lakukan transaksi perbankan internet.
- Gunakan perisian antivirus yang terkini seperti *anti-spyware* dan *firewall*.
- Pastikan komputer dan laman sesawang yang anda lawati adalah yang terkini dan benar-benar tulen.
- Sentiasa periksa tarikh dan masa, pastikan tarikh dan masa terakhir anda layari laman sesawang tersebut.

Perkara yang anda JANGAN lakukan

- Jangan "*klik*" sebarang e-mel yang mempunyai "*link*" atau akses kepada laman sesawang perbankan internet.
- Jangan berikan respon pada sebarang e-mel yang meminta maklumat peribadi anda, termasuk maklumat akaun bank anda.
- Jangan tinggalkan komputer anda tanpa pengawasan apabila anda sedang mengendalikan transaksi perbankan internet.

Laporkan sebarang penipuan internet kepada
CyberSecurity Malaysia
di
cyber999@cybersecurity.my
Tel: 1-300-88-2999

Sumber : infoperbankan



Modal Bukan Kewangan Untuk Persaraan

Persediaan untuk persaraan merupakan langkah yang perlu dilakukan oleh setiap orang, sama ada bekerja di sektor kerajaan, swasta dan bekerja sendiri. Anda perlu membuat pelaburan, simpanan dan meningkatkan pendapatan pasif anda dari semasa ke semasa berdasarkan keperluan persaraan anda untuk masa hadapan. Walau bagaimanapun, anda perlu melakukannya semenjak dari awal lagi agar keperluan persaraan anda benar-benar mencukupi semasa anda bersara kelak.

Namun, apakah yang akan berlaku sekiranya anda terlambat atau tidak membuat persediaan persaraan? Adakah anda boleh menampung keperluan dan perbelanjaan bulanan anda apabila bersara kelak? Anda masih boleh menampung keperluan anda sekiranya anda mempunyai modal insan seperti kemahiran, pendidikan dan mempunyai modal sosial, di samping rakan-rakan serta kawasan kejiranan anda.

Antara modal bukan kewangan yang terbaik sebagai persediaan persaraan yang boleh dilakukan sekarang untuk memastikan kehidupan anda lebih sempurna pada masa hadapan seperti berikut:-

1) Tingkatkan tahap pengetahuan anda tentang Pelaburan

Pelaburan dalam hartanah, unit amanah, saham dan bon ekuiti adalah perkara-perkara yang perlu difahami dan dipelajari. Lebih banyak anda mengetahui dan memahami mengenai pelaburan, lebih banyak anda akan meningkatkan jumlah pelaburan anda untuk persaraan. Anda perlu bijak memilih khidmat nasihat pakar perunding kewangan yang bertauliah. Ia juga boleh membantu anda untuk meningkatkan pendapatan anda selepas bersara.

2) Menguasai kemahiran tertentu

Simpanan sahaja tidak mencukupi untuk menampung persaraan anda. Anda perlu mengenal pasti bakat dan minat atau memulakan sesuatu dari sekarang supaya anda boleh meningkatkan pendapatan dan persediaan anda apabila bersara. Wujudkan pendapatan tambahan seperti memasarkan jualan melalui “facebook”, kemahiran dalam kerja tangan, kemahiran membuat kek, penjagaan bayi atau orang tua, kemahiran menulis dan sebagainya. Sekurang-kurangnya dengan adanya pendapatan tambahan daripada kemahiran tersebut, anda masih boleh bekerja seperti biasa.

3) Kemahiran menyimpan duit secara praktikal

Anda perlu mengetahui langkah-langkah untuk membuat simpanan secara praktikal dan berkesan. Apabila bersara, anda akan berbelanja sama seperti ketika anda bekerja, tetapi wang yang anda perolehi semakin berkurangan. Oleh itu, anda perlu mewujudkan pendapatan pasif seperti mempunyai rumah sewa, mempunyai kereta sewa, pelaburan hartanah, perkongsian perniagaan, pelaburan saham, simpanan emas dan sebagainya. Anda juga boleh memperuntukkan sejumlah simpanan setiap bulan untuk mencukupkan matlamat kewangan


persaraan anda. Seperti contoh, apabila bersara anda memerlukan RM2,000 sebulan untuk menampung kos perbelanjaan anda sebulan. Oleh itu, kemahiran menyimpan duit secara praktikal sangat penting untuk persediaan persaraan anda kelak.

4) Jimatkan kos perbelanjaan

Amalkan langkah-langkah yang dapat menjimatkan kos perbelanjaan harian anda. Wang yang dapat dijimatkan ini boleh disimpan untuk menambah dana persaraan masa hadapan anda. Antara langkah yang dapat menjimatkan kos perbelanjaan adalah dengan mengadakan amalan bergotong-royong, yang melibatkan kejiranan anda, apabila mengadakan majlis perkahwinan atau kenduri kesyukuran. Amalan bergotong-royong ini dapat mengurangkan banyak perbelanjaan, berbanding sekiranya anda menggunakan khidmat katering.

Anda juga boleh mengelakkan daripada membayar kos perubatan kesihatan yang tinggi sekiranya kesihatan anda berada pada tahap yang memuaskan. Oleh itu, anda perlu mengamalkan pemakanan yang sihat, sentiasa bersenam dan memastikan emosi anda sentiasa berada dalam keadaan stabil. Tubuh badan yang sihat dapat mengelakkan daripada wang simpanan untuk persaraan anda digunakan bagi membayar kos perubatan kesihatan.

Pelaburan dalam hartanah, unit amanah, saham dan bon ekuiti adalah perkara-perkara yang perlu difahami dan dipelajari.





Menuntut Wang Simpanan Ahli KWSP Yang Meninggal Dunia

Kematian adalah perkara yang menyayat hati. Walau bagaimanapun, ahli keluarga perlu meneruskan kehidupan sungguhpun sukar untuk melalui detik duka ini. Bagi membantu ahli keluarga yang masih hidup, Kumpulan Wang Simpanan Pekerja telah memperkenalkan Pengeluaran Kematian untuk membolehkan simpanan ahli KWSP dikeluarkan oleh penama ataupun waris terdekat sekiranya ahli meninggal dunia.

Siapakah yang layak untuk memohon pengeluaran ini sekiranya ahli meninggal dunia?

Sekiranya ahli telah membuat penamaan semasa beliau masih hidup, penama yang telah dinamakan merupakan individu yang layak bagi memohon pengeluaran ini dengan syarat penama kepada ahli itu mesti berumur tidak kurang daripada 18 tahun.

Terdapat juga kes yang melibatkan ahli meninggal dunia tanpa membuat penamaan. Sekiranya ini berlaku, waris terdekat ataupun Pentadbir Pusaka ahli adalah layak untuk memohon bagi mengeluarkan simpanan ahli KWSP. Bagaimanapun, KWSP menyeru agar ahli

membuat penamaan terhadap simpanan KWSP mereka bagi memastikan simpanan tersebut dibayar kepada waris yang benar-benar layak.

Berapakah jumlah yang boleh dikeluarkan?

Semua simpanan ahli KWSP yang meninggal dunia boleh dikeluarkan.

Apa akan terjadi sekiranya penama berumur kurang daripada 18 tahun?

KWSP hanya akan membuat pembayaran kepada penama apabila penama mencecah umur 18 tahun. Bagaimanapun, penjaga penama yang sah boleh memohon untuk mengeluarkan simpanan ahli bagi membiayai kehidupan penama. Kelulusan adalah tertakluk kepada budi bicara KWSP yang memerlukan penjaga membuktikan bahawa beliau adalah penjaga yang sah.



“Tanpa penamaan, proses untuk mengeluarkan simpanan ahli KWSP akan pasti menjadi rumit dan perlu melalui beberapa proses yang membebankan.”

Bagaimana situasinya bagi ahli yang beragama Islam?

Jika ahli beragama Islam, penama hanya bertindak sebagai pentadbir (Wasi) yang bertanggungjawab untuk mengagihkan simpanan ahli KWSP yang meninggal dunia mengikut Hukum Faraid.

Sekiranya penamaan telah dibuat, bagaimanakah prosedur untuk membuat Pengeluaran Kematian?

Penamaan yang dibuat dapat menjamin kelancaran proses pengeluaran. Penama boleh memohon Pengeluaran Kematian dengan hanya mengisi Borang 9KM KWSP (AHL) dan mengemukakannya beserta dokumen-dokumen berikut:

- Sijil Kematian Ahli
- Kad Pengenalan waris/pemohon
- Buku Bank Akaun Simpanan Peribadi ataupun salinan asal Penyata Akaun Simpanan Semasa

Dokumen sokongan lain yang diperlukan apabila memohon ialah:

- Borang 22 KWSP perlu dilengkapkan oleh penjaga kepada penama yang belum mencecah usia 18 tahun. Penjaga juga perlu mengemukakan satu salinan Sijil Surat Beranak penama tersebut.
- Borang 10A KWSP perlu dilengkapkan oleh waris terdekat penama yang meninggal dunia selepas kematian ahli. Pemohon juga diperlukan mengemukakan sijil kematian penama.

KWSP hanya akan membuat pembayaran simpanan ahli kepada penama dalam jangka masa dua minggu dengan syarat borang dan dokumen yang diserahkan adalah lengkap.

Apa akan terjadi kepada simpanan KWSP ahli sekiranya ahli gagal untuk membuat Penamaan?

Tanpa penamaan, proses untuk mengeluarkan simpanan ahli KWSP akan pasti menjadi rumit dan perlu melalui beberapa proses yang membebankan.

Sekiranya tiada Penamaan dibuat, KWSP akan membuat pembayaran kepada waris terdekat ahli yang difikirkan sebagai individu yang berhak untuk menerima simpanan ahli KWSP. Waris perlu mengemukakan dokumen-dokumen tersebut apabila memohon untuk Pengeluaran Kematian ahli.

- Sijil Kematian Ahli
- Kad Pengenalan pemohon
- Surat Kuasa Mentadbir atau Surat Probet atau Perintah Pembahagian
- Salinan dokumen yang menyatakan dan mengesahkan ikatan pemohon dengan ahli
- Sijil Perkahwinan
- Sijil Kelahiran Anak (sekiranya ada)
- Buku Akaun Simpanan Peribadi atau salinan asal Penyata Akaun Simpanan Semasa


Bagi ahli yang mempunyai simpanan KWSP yang kurang daripada RM25,000, KWSP hanya akan membayar pendahuluan sebanyak RM2,500 kepada waris terdekat, manakala bakinya akan dibayar selepas tempoh dua bulan dari tarikh ahli meninggal dunia.

Bagi simpanan KWSP melebihi RM25,000, proses untuk mengeluarkan semua simpanan KWSP akan mengambil masa yang lebih lama. KWSP pada peringkat awal akan membayar pendahuluan sebanyak RM2,500 kepada waris terdekat dan pembayaran yang tidak melebihi RM17,500 hanya akan dibuat selepas dua bulan dari tarikh ahli meninggal dunia. Manakala baki simpanan akan dibayar selepas dokumen Surat Kuasa Mentadbir atau Surat Probet atau Perintah Pembahagian atau Sijil Faraid dikemukakan.

Proses untuk memperoleh dokumen ini adalah sukar dan memakan masa yang lama serta berkemungkinan dikenakan bayaran oleh pihak berkuasa yang mengeluarkannya. Perkara sebegini boleh dielakkan sekiranya Penamaan dibuat semasa ahli masih hidup.



“Sebagai tanda simpati dan untuk meringankan beban kewangan ahli keluarga yang masih hidup, KWSP akan membayar Bantuan Kematian sebanyak RM2,500 kepada mereka.”



Adakah waris kepada ahli yang meninggal dunia akan menerima bantuan kematian daripada KWSP?

Ya. Sebagai tanda simpati dan untuk meringankan beban kewangan ahli keluarga yang masih hidup, KWSP akan membayar Bantuan Kematian sebanyak RM2,500 kepada mereka.

Bantuan ini hanya layak diberi jika ahli meninggal dunia sebelum mencecah umur 55 tahun. Bantuan ini tidak semestinya diberikan kepada penama kerana mengikut budi bicara KWSP bantuan ini hanya diberikan kepada waris terdekat iaitu balu, duda, anak ataupun ibu bapa ahli.

Untuk makluman lanjut berkaitan Pengeluaran Kematian, hubungi Pusat Panggilan KWSP di talian 03-8922 6000 atau layari laman web myEPF di www.kwsp.gov.my.

Sumber: Kumpulan Wang Simpanan Pekerja

Selaraskan Pelaburan Dengan Matlamat Kewangan



Untuk mencapai sesuatu matlamat kewangan, anda perlu menetapkan beberapa matlamat berdasarkan tempoh masa seperti berikut:

- Matlamat jangka masa pendek** seperti dana perbelanjaan bulanan sekurang-kurangnya 6 bulan hingga 1 tahun.
- Matlamat jangka masa sederhana** seperti pendidikan anak-anak, membeli rumah, membeli kereta yang lebih selesa dan melancong.
- Matlamat jangka masa panjang** seperti mengerjakan haji, cukup modal untuk membuka perniagaan dan simpanan persaraan yang mencukupi.

Semua matlamat kewangan tersebut memerlukan persediaan dan perancangan yang rapi agar dapat menjamin kesejahteraan hidup kita sepanjang hayat. Anda perlu meningkatkan tabungan dari semasa ke semasa agar matlamat kewangan yang dirancang dapat dipenuhi. Namun, tabungan sahaja tidak mencukupi kerana nilai wang boleh menurun kerana inflasi.

Inflasi

Antara faktor yang boleh merubah nilai wang ialah inflasi. Inflasi bermaksud suatu kenaikan dalam tingkat harga umum barangan dan perkhidmatan dalam sesebuah ekonomi dari semasa ke semasa. Dengan peningkatan tingkat harga umum, setiap unit matawang cuma dapat membeli barangan dan perkhidmatan dalam jumlah yang lebih kurang daripada sebelumnya.

Kesan inflasi boleh dilihat dalam jadual berikut yang menunjukkan penurunan nilai atau kuasa beli untuk beberapa kadar inflasi:-

Pengurangan Nilai atau Kuasa Membeli Dalam Tempoh 15 tahun

Kadar Inflasi	Peratus Pengurangan	Nilai Setara
0%	0%	RM10,000
3%	-35%	RM6,410
5%	-52%	RM4,807
7%	-64%	RM3,623

Melabur Sebagai Peminjam atau Pemegang Saham

Untuk mengatasi kesan inflasi, pelaburan adalah satu langkah yang bijak. **Pelaburan ialah tindakan meletakkan dana bagi satu tempoh untuk memperoleh kadar pulangan yang dikehendaki, dengan menyedari sepenuhnya mengenai risiko yang terbabit.** Bagi mencapai matlamat kewangan, anda harus memilih pelaburan yang menawarkan kadar keuntungan melebihi kadar inflasi. Anda boleh melabur sebagai *peminjam modal* ataupun sebagai *pemegang saham*

Perlu diingat, pelaburan yang menjanjikan keuntungan yang tinggi biasanya berisiko tinggi.

Kadar Keuntungan Dan Risiko Pelaburan

Biasanya kadar keuntungan yang boleh diterima sebagai *peminjam modal* lebih rendah berbanding sebagai *pemegang saham*. Ini disebabkan oleh risikonya lebih rendah.

Anggaran Peningkatan Nilai RM 10,000 untuk tempoh 15 tahun dan 30 tahun

Jenis pelaburan	Dalam 15 tahun	Dalam 30 tahun
Simpanan Tetap (4%)	RM 18,009	RM 32,434
Bon (6%)	RM 23,966	RM 57,435
Saham (10%)	RM 41,772	RM 174,494

Kadar keuntungan bagi jenis-jenis pelaburan di atas hanya merupakan anggaran sahaja.

Sungguhpun perbezaan kadar keuntungan itu beberapa peratus sahaja, namun perbezaan jumlah pulangan amat besar sekali apabila tempoh pelaburan diambil



“Melaburlah berdasarkan kefahaman anda dan bukannya bersandarkan kefahaman rakan-rakan sekeliling anda.”

kira. Semakin lama tempoh pelaburan anda, maka semakin besar jumlah perbezaan.

Persoalannya, patutkah anda mengeluarkan wang simpanan tetap untuk membeli saham atau aset yang mendatangkan pelaburan lumayan? Berikut adalah perkara-perkara yang perlu diambil perhatian sebelum anda membuat keputusan dalam pelaburan.

a) Memahami pelaburan yang ingin anda ambil.

Melaburlah berdasarkan kefahaman anda dan bukannya bersandarkan kefahaman rakan-rakan sekeliling anda. Ini dapat mengelakkan diri anda daripada terlibat dengan kes-kes penipuan seperti skim cepat kaya dan terpengaruh dengan taktik jualan. Carilah skim pelaburan yang sah dan bersesuaian dengan keperluan matlamat kewangan anda. Baca dan fahamilah prospektus yang menerangkan sesuatu pelaburan itu.

b) Melaburlah setelah keperluan anda mencapai matlamat jangka masa pendek dan sederhana.

Risiko jangka pendek pelaburan saham adalah tinggi. Tambah-tambah lagi jika anda membeli saham satu syarikat sahaja. Pelaburan di dalam saham tidak patut dibuat jika wang itu merupakan sebahagian daripada tabungan kecemasan atau simpanan yang anda perlu untuk jangka pendek atau sederhana (lebih kurang 5 tahun) seperti membayar deposit untuk membeli rumah.

c) Ketahuilah jumlah pelaburan dan yuran-yuran yang akan dikenakan.

Jika pelaburan anda akan diuruskan oleh sesuatu badan, dapatkanlah maklumat yang lengkap tentang jumlah pelaburan serta kos-kos pengurusan yang berkaitan.

d) Kurangkan bayaran cukai.

Mengurangkan cukai bukan bermaksud mengelak membayar cukai. Terdapat pelbagai peruntukan yang membolehkan cukai itu dikurangkan. Ketahuilah perkara ini agar keuntungan pelaburan anda tidak terhakis akibat cukai yang dikenakan.

Sumber: Panduan Kewangan Peribadi dan Keluarga “Cukup Wang Hati Tenang untuk Semua” oleh Hajah Rohani Datuk Hj Mohd Shahir.



Kereta Baru Atau Kereta Terpakai?

Sebaik sahaja anda mula bekerja, salah satu keputusan penting yang anda akan ambil ialah membeli sebuah kereta. Walaupun kereta merupakan kaedah pengangkutan yang selesa, namun perlu diketahui bahawa memiliki sebuah kereta bukan setakat membayar ansuran bulanan sahaja. Ia juga melibatkan kos lain seperti petrol, bayaran tol, bayaran parkir kereta, cukai jalan, insurans, kos penyelenggaraan serta kos membaiki apabila kereta anda rosak.

Seandainya anda boleh membayar segala kos yang disebutkan tadi dengan selesa, anda masih perlu bertanya kepada diri anda sama ada kereta itu merupakan suatu keperluan ataupun kehendak?

Apabila kereta adalah keperluan, anda perlu membuat keputusan sama ada ingin membeli kereta baru atau kereta terpakai. Ramai orang beranggapan bahawa membeli kereta baru adalah lebih baik kerana kos penyelenggaraannya rendah, tetapi pada hakikatnya memiliki kereta baru juga ada kelemahannya.

Ketika memutuskan jenis kereta yang diperlukan, anda hendaklah terlebih dahulu menilai kemampuan anda. Jika didapati membeli kereta baru boleh membebankan, belilah kereta terpakai yang masih berkeadaan baik. Lagipun, kereta hanya sebuah kenderaan yang membawa anda bergerak dari suatu tempat ke tempat yang lain.



Tip Bijak Membeli Kereta

- Buat perbandingan untuk mendapatkan kereta yang boleh diharapkan dan memenuhi keperluan anda. Ada baiknya jika anda meminta nasihat daripada ahli keluarga atau sahabat yang mahir/pakar mengenai kereta.
- Jika anda ingin membeli kereta terpakai, dapatkan khidmat mekanik yang boleh dipercayai atau melakukan pemeriksaan kereta tersebut di PUSPAKOM.
- Pertimbangkan harga jualan semula atau nilai tukar beli kereta sekiranya anda bercadang untuk menukarnya kelak.

- Sekiranya anda mengambil keputusan untuk memohon pinjaman kereta, cari pakej terbaik berdasarkan kemampuan anda. Dapatkan maklumat mengenai kadar faedah efektif yang akan dikenakan.
- Rangka bajet mengikut pendapatan anda. Ambil kira ansuran bulanan kereta dan kos-kos yang lain, seperti kos petrol, bayaran tol, parkir kereta, perbelanjaan lain, termasuk cukai jalan, insurans dan servis biasa.
- Cuba tingkatkan tabungan untuk bayaran pendahuluan supaya pinjaman yang diambil lebih rendah dengan tempoh pembayaran yang lebih singkat. Perlu diingatkan bahawa semakin panjang tempoh pinjaman, semakin banyak faedah yang anda perlu bayar. Ini mungkin akan menyukarkan anda untuk menjual kereta tersebut kerana nilai



“Ketika memutuskan jenis kereta yang diperlukan, anda hendaklah terlebih dahulu menilai kemampuan anda.”



“Pastikan kereta anda mempunyai perlindungan insurans komprehensif yang mencukupi ... ”

pasaran kereta jauh lebih rendah berbanding dengan baki pinjaman.

- Jangan gunakan kad kredit untuk membuat bayaran pendahuluan kerana anda terikat dengan pinjaman pada kadar faedah yang sangat tinggi.
- Bersedia untuk menanggung perbelanjaan di luar dugaan seperti membaiki kereta sekiranya berlaku kerosakan atau kemalangan. Ada baiknya untuk mengetahui tentang kemudahan mendapat alat ganti serta kos untuk menggantikannya.
- Pastikan kereta anda mempunyai perlindungan insurans komprehensif yang mencukupi atau sekurang-kurangnya mempunyai perlindungan insurans pihak ketiga.

Sumber: Buku *POWER !* Pengurusan wang ringgit anda oleh Agensi Kaunseling dan Pengurusan Kredit.



POWER
untuk lebih
Yakin

Urus Keuangan Anda
dengan penuh keyakinan

POWER! Pengurusan Wang Ringgit Anda ialah program pendidikan kewangan praktikal yang dikendalikan oleh Agensi Kaunseling dan Pengurusan Kredit (AKPK).

POWER! direka khas untuk memberikan anda pengetahuan asas kewangan dan cara pengurusannya supaya anda lebih yakin dan boleh membuat keputusan pengurusan kewangan secara wajar.

**Dapatkan power anda
sekarang!**

Penyertaan adalah
PERCUMA.
Daftarlah sekarang
1800 88 2575
www.akpk.org.my

PROGRAM INI DIREKA KHAS UNTUK

PG-18

**18 TAHUN
& KE ATAS**

POWER!
pengurusan wang ringgit anda

Untuk keterangan lanjut, layari
www.akpk.org.my | www.speaksens.com.my
atau hubungi **1800 88 2575**



Bank Negara Malaysia

Talian Tol : 1-300-88-5465
E-mel : bnmtelelink@bnm.gov.my
Laman web : www.bnm.gov.my

Persatuan Bank-Bank Malaysia (ABM Connect)

Talian Tol : 1-300-88-9980
E-mel : banks@abm.org.my
Laman web : www.abm.org.my

Agensi Kaunseling Dan Pengurusan Kredit (AKPK)

Talian Tol : 1-800-88-2575
E-mel : enquiry@akpk.org.my
Laman web : www.akpk.org.my

Biro Pengantaraan Kewangan (BPK)

Talian am : 03-2272 2811
E-mel : enquiry@fmb.org.my
Laman web : www.fmb.org.my

Sebarang maklum balas sila e-melkan kepada ringgit@crcc.org.my